

Ո Ր Ո Շ ՈՒ Մ թիվ - 174
վարչական տույժ նշանակելու մասին

«24» հունիսի 2021թ.

ք. Երևան

ՀՀ պետական եկամուտների կոմիտեի իրավաբանական վարչության պետ Ա. Մնացականյանս, քննելով Ակբար Նաջաֆգիոլիզադեի վերաբերյալ նյութերը՝

Պ Ա Ր Զ Ե Ց Ի՝

2021 թվականի ապրիլի 26-ին ՀՀ ՊԵԿ ՄԴՊ վարչության աշխատակիցները Մեղրիի մաքսային կետ-բաժնի մաքսային հսկողության գոտում զննության են ենթարկել ՀՀ-ից ԻԻՀ մեկնող ԻԻՀ քաղաքացի Ակբար Նաջաֆգիոլիզադեի կողմից շահագործվող <<VOLVO>> մակնիշի, 59A319/20-10 հաշվառման համարանիշի բեռնատար ավտոմեքենան, ինչի արդյունքում ավտոմեքենայի վարորդի խցիկի հանգստի հատվածի ներքևի մասում նախապես պատրաստված թաքստոցից հայտնաբերել են մաքսային հսկողությունից թաքցրած, ՀՀ մաքսային սահմանով տեղափոխված ընդհանուր 190 կգ քաշով 86 հատ տարբեր տրամաչափի գայլիկոն, 1300 հատ էլեկտրական սղոցի համար նախատեսված սկավառակ և 24 տուփ մետաղյա վեցանկյուն դետալ:

Փաստի առթիվ Ակբար Նաջաֆգիոլիզադեի նկատմամբ ՀՀ մաքսային օրենսգրքի 201-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ իրավախախտման անմիջական օբյեկտ համարվող ապրանքները վերցվել և ի պահ են հանձնվել ՀՄՎ Մեղրի մաքսային կետ բաժնի պահպանման պահեստին:

Վերոնշյալ ապրանքների շուկայական արժեքը 2021թ-ի ապրիլի 26-ի դրությամբ որոշելու համար՝ 12.05.2021 թվականին նշանակվել է ապրանքագիտական փորձաքննություն, որի կատարումը հանձնարարվել է ՀՀ «Փորձագիտական կենտրոն» պետական ոչ առևտրային կազմակերպության փորձագետին:

ՀՀ «Փորձագիտական կենտրոն» պետական ոչ առևտրային կազմակերպության փորձագետի 08.06.2021թ. թիվ 10012110 եզրակացության համաձայն՝ փորձաքննությանը ներկայացված ապրանքի շուկայական արժեքը 2021 թվականի ապրիլի 26-ի դրությամբ կարող էր կազմել ընդհանուր 4.404.000 ՀՀ դրամ:

ԵԱՏՄ մաքսային օրենսգրքի 2-րդ հոդվածի 1-ին մասի 25-րդ կետի համաձայն՝ «Միության մաքսային սահմանով ապրանքների անօրինական տեղափոխում» է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով և (կամ) նույնականացման՝ կեղծ կամ այլ ապրանքներին վերաբերող միջոցներ օգտագործելու միջոցով:

Մաքսային կարգավորման մասին օրենքի 73-րդ հոդվածի 2-րդ մասի համաձայն՝ ՀՀ սահմանով արտահանվող ապրանքի մաքսային արժեքը գործարքի գինն է, այսինքն՝ այն գումարը, որը փաստացի վճարվել է կամ պետք է վճարվեր ապրանքը արտահանելու նպատակով ձեռք բերելու և մինչև ՀՀ սահմանը տեղափոխելու համար:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 201-րդ հոդվածի համաձայն՝ Հայաստանի Հանրապետության մաքսային սահմանով ապրանքների տեղափոխումը՝ մաքսային հսկողությունից թաքցնելով, այսինքն՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների մաքսային արժեքի չափով:

ՀՀ մաքսային օրենսգրքի 219-րդ հոդվածի համաձայն՝ մաքսային կանոնների խախտման վերաբերյալ գործը քննվում է վարչական պատասխանատվության ենթարկվող անձի մասնակցությամբ: Գործը կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Ակբար Նաջաֆգիդիզադեի 2021 թվականի հունիսի 24-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 201-րդ հոդվածի հատկանիշներով սկսված վարչական գործի քննությանը մասնակցելու համար, սակայն վերջինս չի ներկայացել:

Սահմանային էլեկտրոնային կառավարման տեղեկատվական համակարգի տվյալների համաձայն՝ ԻԻՀ քաղաքացի Ակբար Նաջաֆգիդիզադեի գտնվում է ՀՀ սահմաններից դուրս:

Այսպիսով, նյութերով պարզվել է, որ 2021 թվականի ապրիլի 26-ին ԻԻՀ քաղաքացի, Ակբար Նաջաֆգիդիզադեի մաքսային հսկողությունից թաքցնելով՝ բեռնատար ավտոմեքենայի վարորդի խցիկի հանգստի հատվածի նեքլի մասում նախապես պատրաստված թաքստոցում տեղադրելով, ՀՀ մաքսային սահմանով տեղափոխել է 4.404.000 ՀՀ դրամ մաքսային արժեքով 190 կգ ընդհանուր քաշով 86 հատ տարբեր տրամաչափի գայլիկոն, 1300 հատ էլեկտրական սղոցի համար նախատեսված սկավառակ և 24 տուփ մետաղյա վեցանկյուն դետալ, այսինքն՝ վերջինս թույլ է տվել ՀՀ մաքսային օրենսգրքի 201-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ արձանագրությամբ, ՀՀ «Փորձագիտական կենտրոն» պետական ոչ առևտրային կազմակերպության փորձագետի 08.06.2021թ. թիվ 10012110 եզրակացությամբ:

Վերոգրյալի հիման վրա և ղեկավարվելով ՀՀ մաքսային օրենսգրքի 201-րդ հոդվածով, 206-րդ և 221-րդ հոդվածներով,

Ո Ր Ո Շ Ե Ց Ի՝


1. Ակբար Նաջաֆգիոլիզադեհին (անձնագիր՝ B45306190) ճանաչել զանցառու ՀՀ մաքսային օրենսգրքի 201-րդ հոդվածով և նրան տուգանել թաքցնելով ՀՀ մաքսային սահմանով տեղափոխված վերոնշյալ ապրանքի մաքսային արժեքի չափով՝ 4.404.000 ՀՀ դրամի չափով:

/վճարումը 900005024055 հաշվեհամարին/

2. Վերցված ապրանքները կարող են վերադարձվել տուգանքի վճարումից հետո՝ մեկ աշխատանքային օրվա ընթացքում:

3. Որոշման մասին հայտնել Ա. Նաջաֆգիոլիզադեհին՝ պարզաբանելով ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ դա կայացնելուց հետո 10 օրվա ընթացքում կամ ՀՀ վարչական դատարան երկու ամսվա ընթացքում:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՑԱԿԱՆՅԱՆ